

RMG - კომპანიის პროფილი

ბოლნისის რაიონში ოქრო-სპილენძ-ბარიტ-პოლიმეტალების საბადოს შესწავლა გასული საუკუნის 40-იან წლებში დაიწყო. ფერადი ლითონების ერთ-ერთი უდიდესი საწარმოს - მადნეულის კომბინატის მშენებლობას 1959 წელს ჩაეყარა საფუძველი. 1975 წელს ექსპლუატაციაში შესული კომბინატი ახორციელებდა სპილენძის, ბარიტის, ოქრო-ვერცხლის შემცველი კვარციტების და პოლიმეტალური მადნების მოპოვებას, მოპოვებული სპილენძის და ბარიტის მადნების პირველად გადამუშავებას, გამდიდრებას და მიღებული პროდუქტის რეალიზაციას. ბარიტის მოპოვება 1990 წელს შეწყდა. 1994 წელს შეიქმნა "კვარციტი", რომელმაც დაიწყო ცალკე დასაწყობებული ოქროსშემცველი კვარციტის მადნიდან ოქროსა და ვერცხლის დორეს მიღება გროვული გამოტუტვის მეთოდით. 2005 წელს „მადნეულისა“ და „კვარციტის“ პრივატიზების შედეგად საწარმოების მფლობელი გახდა ბრიტანეთის ვირჯინიის კუნძულებზე (ოფშორულ ზონაში) რეგისტრირებული კომპანია „სთენთონ იქვიტიზ ქორფორეიშენს“ რუსული „პრომიშლენი ინვესტორის“ შვილობილი კომპანია. 2007 წლის დეკემბერში „პრომიშლენი ინვესტორმა“ „მადნეულსა“ და „კვარციტში“ წილები კომპანია GeoProMining-ს მიყიდა, რომლის მფლობელი „პრომიშლენი ინვესტორის“ დირექტორთა საბჭოს თავმჯდომარე და თანამფლობელი, სიმან პოვარენკინი იყო. 2012 წლიდან კი საწარმოების მფლობელი კვლავ რუსული კომპანია „კაპიტალ ჯგუფი“ გახდა. 2012 წელს მფლობელის გამოცვლასთან დაკავშირებით სს „მადნეულს“ დაერქვა - არემჯი კოპერ (RMG Copper), ხოლო შპს „კვარციტს“ - არემჯი გოლდ (RMG Gold).

RMG GOLD

საქართველოს მეწარმეთა და არასამეწარმეო იურიდიულ პირთა საჯარო რეესტრის მონაცემების თანახმად, 2019 წლის ივნისამდე შპს RMG Gold-ის მესაკუთრეები იყვნენ: კერძო შეზღუდული პასუხისმგებლობის კომპანია Rich Metals Group B.V., რეგისტრირებული ნიდერლანდებში (წილის 96.21%) და სს RMG Copper (წილის 3.79%). 2019 წლის 10 ივნისს კომპანიის სარეგისტრაციო დოკუმენტაციაში შესული ცვლილებების თანახმად, Rich Metals Group B.V. ლიკვიდაციის გამო 96.21% მფლობელი გახდა ლიკვიდირებული კომპანიის ერთადერთი აქციონერი შპს მაინინგ ინვესტმენტს (ს/კ404415824).

2015 წლიდან „მწვანე ალტერნატივა“ გამოსცემს პერიოდულ ანგარიშს „გარემოს მდგომარეობის შესახებ ინფორმაციის ხელმისაწვდომობის შესახებ საქართველოში“. გარემოს მდგომარეობის შესახებ ინფორმაციის ხელმისაწვდომობის განხილვისას ვაფასებთ ე.წ. მსხვილი დამზინძურებლების შესახებ ინფორმაციის ხელმისაწვდომობის მდგომარეობას და ვამზადებთ საქმიანობის მასშტაბითა და გარემოსა და ადამიანების ჯანმრთელობაზე ზემოქმედების თვალსაზრისით ოთხი გამორჩეული საწარმოს პროფილს. ესენია:

- (1) არემჯი
- (2) ჯორჯიან მანგანუმი
- (3) საქნახშირი; და
- (4) ჰაიდელბერგცემენტი.

ეს დოკუმენტი არემჯი ჯგუფის შესახებ ინფორმაციის ხელმისაწვდომობის მდგომარეობას აღწერს.

შპს „მაინინგ ინვესტმენტს“-ის შესახებ საზოგადოებამ პირველად 2012 წლის თებერვალში გაიგო, როდესაც კომპანია ბუნებრივი რესურსების სააგენტოს მიერ გამართული აუქციონის ერთადერთი მონაწილე აღმოჩნდა. აუქციონზე შიდა ქართლის რეგიონში ოქროს, სპილენძისა და სხვა ძვირფასი მინერალების შესწავლა-მოპოვებაზე 27 წლიანი ლიცენზია იყო გამოტანილი. შპს „მაინინგ ინვესტმენტსი“ თბილისში 2012 წლის 13 თებერვალს, აუქციონის ჩატარებამდე ორი კვირით ადრე დარეგისტრირდა და ლიტვის მოქალაქე ალვიდას ბრუსოკასი იყო შპს „მაინინგ ინვესტმენტსი“ დირექტორი და ერთადერთი მფლობელი¹.

არ შეცვლილა RMG Gold-ის სამეთვალყურეო საბჭო და მის წევრებად რჩებიან: რუსი მილიარდერები [დმიტრი ტროიციკი](#) და [დმიტრი კორჟევი](#) და ირინა ნიკიფოროვა, ასევე რუსეთის მოქალაქე. კომპანიის აღმასრულებელი დირექტორია - თორნიკე ლიპარტია.

RMG Gold არის საყდრისის ცნობილ საბადოზე წაიღითსარგებლობის ლიცენზიის მფლობელი.

ბულალტრული აღრიცხვის, ანგარიშგებისა და აუდიტის ზედამხედველობის სამსახურის ვებ-გვერდზე გამოქვეყნებულია შპს RMG Gold-ის [2017](#)² და [2018](#) წლების ინდივიდუალური წლიური ანგარიშები.

2018 წლის ანგარიშის თანახმად, „კომპანიის მადნის რეზერვის ბოლო გარე შეფასება საყდრისის საბადოსთვის 2013 წლის მაისის თვეში ჩაატარა კომპანიამ „Snowden Mining Industry Consultants“, შეფასების თანახმად, საყდრისის საბადოზე არსებული მინერალური რესურსების რაოდენობა 10,400 ათასი ტონის ოდენობით განისაზღვრა. თავად კომპანია ატარებს მადნის რეზერვების დეტალურ შიდა შეფასებას, ამოთხრილი მიწის საფუძველზე არსებული ინფორმაციის გათვალისწინებით, რომელიც მეტად ზუსტია, ვიდრე ნაბურღი ხვრელებიდან და სხვა ღიობებიდან აღებული სინჯების საფუძველზე ჩატარებული შეფასებები. კომპანიის გეოლოგების მიერ დაანგარიშებული მარაგების სავარაუდო რაოდენობა იყო შემდეგი: საყდრისის საბადო 2,290 ათასი ტონა (76 ათასი უნცია) და მადნეულის მესამე ჯერზე გადამუშავების შედეგი (შენიშვნა 17) - 19,200 ტონა (154 ათასი უნცია). ამასთან, კომპანიამ შეაფასა 1,648 ათასი ტონა (24 ათასი უნცია) ბარიტის მადნის რაოდენობა დასამუშავებლად“.

იმავე ანგარიშის თანახმად, 'კომპანიამ გროვული გამოტუტვის პროცესი საყდრისის ტერიტორიაზე 2014 წელს დაიწყო, რომელიც ასევე მიმდინარეობს 2017 წელს. კომპანიამ მადნეულის ტერიტორიაზე მადნის მეორადი გადამუშავება დაასრულა და დაიწყო მესამედური გადამუშავების პროცესი 2017 წლის სექტემბერში. მესამედური გადამუშავების პროცესის დაწყებამ და საყდრისის ტერიტორიის გაფართოებამ გამოიწვია სამთო-გადამამუშავებელი ოპერაციების გახანგრძლივება, რის გამოც კომპანიამ სამთო-გადამამუშავებელი გეგმის ცვლილება მოახდინა, მოსალოდნელი ოპერაციების ვადები მადნეულის ტერიტორიისთვის 2020 დან 2021 წლამდე, ხოლო საყდრისის ტერიტორიისთვის 2025 დან 2028 წლამდე გახანგრძლივდა. საყდრისის საბადოსთან დაკავშირებით, არსებობს მოლოდინი, რომ ერთჯერადად დამუშავებული მადანი კვლად გადამამუშავდება, ისევე როგორც მადნეულის ტერიტორიის შემთხვევაში მოხდა. ამასთანავე, დაგეგმილია საყდრისის მეხუთე უბნის გაფართოება,

¹ ['წიაღისეულის აუქციონმა ვერ შეძლო დიდი ინვესტორების მოზიდვა' საერთაშორისო გამჭვირვალობა საქართველო, 1 მარტი, 2012](#)

² 2017 წლის ფინანსური ანგარიში ხელმისაწვდომია ასევე [ინგლისურად](#)

რომელიც თავის მხრივ გამოიწვევს სამთო-გადამამუშავებელი ოპერაციების გახანგრძლივებას საყდრისის ტერიტორიაზე. ოქროს ხარისხის დონე ფასდება კომპანიის გეოლოგების მიერ. ოქროს საშუალო ხარისხი საყდრისის ტერიტორიაზე ტონაზე 1.03 გრამია (გრ/ტ), ხოლო მადნეულის ტერიტორიაზე დამუშავებული მადნისთვის არის 0,25 გრ/ტ და ბარიტის მადნისთვის - 0,49 გრ/ტ. კომპანიის გეოლოგების მიერ ოქროს ამოღებადობის მინიმალური განაკვეთი ფასდება საყდრისის ტერიტორიისთვის დაახლოებით 61%-ის, მადნეულის - 15%, ხოლო ბარიტის - 50% განაკვეთის სახით'.

საგულისხმოა, რომ ფინანსურ ანგარიშში ასევე მიმოხილულია ისეთი გარემოსდაცვითი საკითხები, როგორცაა: ნიადაგზე, ატმოსფერულ ჰაერზე, წყალზე, ბიომრავალფეროვნებაზე ზემოქმედება, სანაყაროების ფერდობების მდგრადობა, ნარჩენების მართვა.

RMG COPPER

სს **RMG Copper**-ის მფლობელების შესახებ ინფორმაცია მეწარმეთა და არასამეწარმეო იურიდიულ პირთა რეესტრში არ არის წარმოდგენილი, ვინაიდან აქციის მფლობელების შესახებ ინფორმაციის საჯაროობას საქართველოს კანონმდებლობა არ უზრუნველყოფს. თუმცა, 2016 წლიდან „ბულალტრული აღრიცხვის, ანგარიშგებისა და აუდიტის შესახებ“ საქართველოს კანონის მოთხოვნების ამოქმედებასთან დაკავშირებით სს **RMG Copper**-აც გაჩნდა საჯარო ფინანსური ანგარიშგების ვალდებულება და შეიძლება ითქვას, რომ ბულალტრული აღრიცხვის, ანგარიშგებისა და აუდიტის ზედამხედველობის სამსახურის ვებ-გვერდზე გამოქვეყნებული სს **RMG Copper** (სამწუხაროდ მხოლოდ) 2017 წლის ფინანსური ანგარიში ყველაზე მეტ ინფორმაციას მოიცავს კომპანიის მფლობელების შესახებ, რაც კი აქამდე საჯაროდ ხელმისაწვდომი გამხდარა.

[სს **RMG Copper** 2017 წლის ფინანსური ანგარიშის](#) თანახმად, კომპანიას ჰყავს 2 შვილობილი: შპს „**Belaz Kavkaz Trans Service**“, შპს „**Trans Petg Mzidi**“ სადაც მისი წილი 50%-ს უტოლდება. 2017 და 2016 წლების 31 დეკემბრის მდგომარეობით, კომპანიის 99.6%-ის მფლობელი არის **Rich Metals Group B.V.** (ნიდერლანდები), ხოლო საბოლოო მფლობელები იყვნენ ბრიტანეთის ვირჯინიის კუნძულებზე რეგისტრირებული „**Suncort Enterprises Limited**“ და „**Ticola Holdings Limited**“. 2017 და 2016 წლების 31 დეკემბრის მდგომარეობით კომპანიის საბოლოო მაკონტროლებელი მხარე ორი ფიზიკური პირი იყო - დიმიტრი ტროიცი და დიმიტრი კორჟევი, რომლებსაც აქვთ უფლება საკუთარი შეხედულებისამებრ და საკუთარი სარგებლისთვის წარმართონ კომპანიის ოპერაციები.

უნდა ვივარაუდოთ, რომ 2019 წელს **Rich Metals Group B.V.** ლიკვიდაციის გამო სს **RMG Copper**-ის 96.21% მფლობელიც ლიკვიდირებული კომპანიის ერთადერთი აქციონერი შპს მაინინგ ინვესტმენტს (ს/კ404415824) გახდა.

ანგარიშში ასევე აღნიშნულია, რომ „კომპანია ფლობს მადნეულის საბადოს მინერალური რესურსების კვლევის, მოპოვების და გადამამუშავების ლიცენზიას ბოლნისის რაიონში 2041 წლამდე. კომპანიის ძირითადი საქმიანობაა ოქრო-სპილენძის კონცენტრატის წარმოება და გაყიდვა. კომპანიის საქმიანობის თანმდევი პროდუქტია ე.წ. ცემენტირებული ოქრო-სპილენძის კონცენტრატის წარმოება და გაყიდვა. კომპანიის ტექნოლოგიური პროცესი წარმოადგენს ქანებიდან ოქროს და სპილენძის ამოღებას ფლოტაციის

ტექნოლოგიური პროცესის საშუალებით. ფლოტაცია წარმოადგენს პროცესს, სადაც წვრილად დაფქვილ ქანებში წყლის და რეაგენტების გამოყენებით (ძირითადად კირის საშუალებით) ხდება კონცენტრატის ანუ იმ ფრაქციის გამოყოფა რომელიც ყველაზე მეტ ოქროს და სპილენძს შეიცავს. აღნიშნული პროცესის მეშვეობით 2017 წელს გადამუშავდა 2.4 მილიონი ტონა მადანი რომელშიც სპილენძის შემცველობა იყო 0.54% და ოქროს შემცველობა 0,69 გრამი ტონაზე. წარმოებულმა კონცენტრატმა შეადგინა 59,562 ტონა რომელშიც სპილენძის შემცველობა იყო საშუალოდ 15,76% და ოქროს შემცველობა 18.18 გრამი ტონაზე. სპილენძის და ოქროს მადნიდან ამოღების კოეფიციენტებმა შეადგინა შესაბამისად 72.31% და 65.38%. ფლოტაციის ტექნოლოგიით მხოლოდ გარკვეული ტიპის ე.წ. სულფიდური მადნის გადამუშავება შეიძლება, ამიტომაც კომპანია შესაბამის მადანს იღებს როგორც საკუთარი ე.წ. მადნეულის კარიერიდან ისე შპს არემჯი გოლდის საყდრის საბადოდან. 2018-2025 წლებში დაგეგმილია 13,3 მილიონი ტონა მადნის მოპოვება მადნეულის კარიერიდან და ამავე პერიოდში 10,6 მილიონი ტონა მადნის შესყიდვა შპს არემჯი გოლდიდან. კომპანიის კუთვნილ ფაბრიკაში 2019 წლიდან ასევე იგეგმება შპს აურამაინის მიერ წარმოებული მადნის გადამუშავება“.

RMG Copper-ის შემთხვევაშიც ფინანსურ ანგარიშში მიმოხილულია ისეთი გარემოსდაცვითი საკითხები, როგორცაა: ატმოსფერულ ჰაერზე, წყალზე, ბიომრავალფეროვნებაზე ზემოქმედება და მონიტორინგი, ხმაური და ნარჩენების მართვა.

მაინინგ ინვესტმენტს

შპს მაინინგ ინვესტმენტს (ს/კ404415824) როგორც ზემოთ აღვნიშნეთ 2012 წელს და ლიტვის მოქალაქე ალვიდას ბრუსოკასის მიერ რეგისტრირებული კომპანიაა. წლების განმავლობაში კომპანიაში სხვადასხვა ტიპის ცვლილებები განხორციელდა. 2015 წელს შპს მაინინგ ინვესტმენტს შეერწყა იმავე კომპანიის საკუთრებაში არსებული შპს მაინინგ დეველოპმენტს - ჯორჯია³ (ს/კ404944414). სხვადასხვა დროს კომპანიის გენერალური დირექტორები იყვნენ რუსეთის მოქალაქე იური პილიპენკო, ვახტანგ ფარესიშვილი⁴, რომელიც 11.12.2018-დან [საქართველოს ფინანსთა სამინისტროს საგამომიებო სამსახურის უფროსის მოადგილის](#)⁵ თანამდებობას იკავებს და სოლომონ ცაბაძე.

დღეის მდგომარეობით კომპანიის 100%-იან წილს კვიპროსში დაარსებული შპს ფემთილონ ჰოლდინგს ლიმიტედი ფლობს. კომპანიის დირექტორი რუსეთის მოქალაქე ალექსანდრ ჩერნიხია; ხოლო სამეთვალყურეო საბჭოს წევრები არიან რუსეთის მოქალაქე დიმიტრი ტროიცკი, კახაბერ მჭედლიშვილი და ალექსანდრ ჩერნიხი.

³ 2012 წელს რეგისტრაციისას კომპანიის მფლობელი იყო კვიპროსზე რეგისტრირებული სპეციალქს კო, ხოლო დირექტორი - სოლომონ ცაბაძე. ეს კომპანია თავის მხრივ ფლობდა შპს მინერალ რესურსიზ მენეჯმენტს (ს/კ 404944600), რეგისტრირებულია 15/05/2012, დირექტორი: ზურაბ ქუთელია. 2013 წელს კომპანია შეერწყა მფლობელს.

⁴ 2014 - 2017 წლებში იყო შპს „მაინინგ ინვესტმენტს“ (RMG ჯგუფი) - დირექტორი, სამეთვალყურეო საბჭოს წევრი. ამავე წლებში იგივე პოზიციას იკავებდა შპს RMG Gold-ში, სს RMG Copper-ში და კავკასიის სამთო ჯგუფში.

⁵ საგულისხმოა, რომ 6.12.2018-დან [საქართველოს ფინანსთა სამინისტროს საგამომიებო სამსახურის უფროსის თანამდებობას იკავებს სოსო რამიშვილი](#), რომელიც 21.02.2017-13.03.2018 პერიოდში შპს RMG Gold-ის და სს RMG Copper-ის აღმასრულებელი დირექტორის მოადგილე იყო

კავკასიის სამთო ჯგუფი

კომპანიებთან მჭიდროდ არის დაკავშირებული შპს „კავკასიის სამთო ჯგუფი“ (ს/კ 404908775), რომელიც 2011 წლიდან (ფაქტიურად, რეგისტრაციის მომენტიდან) არის მანამდე სს „მადნეულისათვის“ ჩამორთმეული შესწავლა-მოპოვების ლიცენზიის⁶ მფლობელი. „კავკასიის სამთო ჯგუფის“ მფლობელიც კვიპროსზე რეგისტრირებული კომპანია **Pamtilon Holdings Limited**-ია. კავკასიის სამთო ჯგუფის გენერალური დირექტორი ჯონდო შუბითიძეა. სამეთვალყურეო საბჭოს წევრები აქაც რუსეთის მოქალაქე დმიტრი კორჟევი, კახაბერ მჭედლიშვილი და ასევე რუსეთის მოქალაქე ირინა ნიკიფოროვაა.

შპს „კავკასიის სამთო ჯგუფი“ ფლობს შპს „არ ემ ჯი აურამაინის“ (404908775) 100% წილს და შპს „ჯორჯიან გოლდ კომპანის“ (405205987) 100% წილს, რომელთა გენერალური დირექტორი თორნიკე ლოპარტიაა. ასევე, „კავკასიის სამთო ჯგუფი“ ბრიტანეთის ვირჯინიის კუნძულებზე რეგისტრირებულ [Georgian Mining Corporation](#)-თან ერთად ფლობს (50% წილს) საქართველოში რეგისტრირებულ სს „ჯორჯიან კოპერ ენდ გოლდს“ (სკ 405117494).

სს „ჯორჯიან კოპერ ენდ გოლდის“ გენერალური დირექტორი 2016 წლის 18 ნოემბრამდე, ამჟამად საქართველოს პარლამენტის თავმჯდომარის მოადგილე და მანამდე, პარლამენტის გარემოსა და ბუნებრივი რესურსების დაცვის კომიტეტის თავმჯდომარე, კახაბერ კუჭავა იყო. 2016 წლის 15 ნოემბერამდე კახაბერ კუჭავა, ასევე, იყო შპს „ამბრელა ენტერპრაიზის“ (404879798) 33% წილის მფლობელი (წილი 100 ლარად იყიდა ირაკლი კუჭავამ); ხოლო 2011 წლიდან 2016 წლის 11 ოქტომბრამდე იყო შპს „ამბრელა ენტერპრაიზის“ მიერ დაფუძნებული სს „კარლტონ ჯორჯიას“ (შემდგომში სს **ZOPKHITO GOLD**, ამჟამად სს „კავკასიის მინერალები“) დირექტორი, რომელმაც 2011 წელს ონის რაიონში ფერადი, კეთილშობილი, იშვიათი ლითონების და ბარიტის მოპოვება-შესწავლის 30 წლიანი ლიცენზია 990 000 ლარად მოიპოვა.

„მადნეული“ და „კვარციტი“ ერთ-ერთი პირველი საწარმოები იყო, სადაც 2003 წლის “ვარდების რევოლუციის” შემდეგ მთავრობამ კორუფციის აღმოფხვრასა და მმართველობის გაუჯობესებაზე დაიწყო ზრუნვა. დღეისათვის ამ საწარმოებში კორუფციის არსებობაზე აღარავინ საუბრობს, თუმცა, კომპანიების მიმართ სახელმწიფო უწყებების განსაკუთრებული „კეთილგანწყობა“ და ლოიალური დამოკიდებულება ელიტური კორუფციის არსებობის ეჭვს აჩენს. მაგალითისათვის, საყდრისი-ყაჩაღიანის მსოფლიოში უძველესი ოქროს მადაროსთვის ეროვნული მნიშვნელობის ძეგლის სტატუსის

⁶ ლიცენზია გაცემულია ბოლნისის, მარნეულის, დმანისის, წალკისა და თეთრიწყაროს მუნიციპალიტეტებში ფერადი, კეთილშობილი, იშვიათი მეტალებისა და ბარიტის შესწავლა-მოპოვებისათვის. ლიცენზია გაცემულია 187 823, 59 ჰა ფართობზე რაც ქვეყნის საერთო ფართობის 2,7%-ია.

მოხსნისა და კომპანიისათვის ძეგლის აფეთქების ნებართვის მიცემის ფაქტიც⁷ კმარა. თუმცა, სულ ახალხან ელიტური კორუფციის მორიგი გამოვლინების მომსწრენი გავხდით.

ლეგალიზებული კანონდარღვევები

საქართველოს კანონმდებლობის თანახმად, საქმიანობები, რომელთა განხორციელებამ შესაძლოა მნიშვნელოვანი ზემოქმედება მოახდინოს გარემოზე, ადამიანის სიცოცხლეზე ან/და ჯანმრთელობაზე, შესაძლოა განხორციელდეს მხოლოდ კომპეტენტური ორგანოს - გარემოს დაცვისა და სოფლის მეურნეობის სამინისტროს წინასწარი თანხმობის (2018 წლამდე გარემოზე ზემოქმედების ნებართვის, 2018 წლის შემდეგ ე.წ. გარემოსდაცვითი გადაწყვეტილების) საფუძველზე. თუმცა, კანონის ამ მოთხოვნის შესრულება ყოველთვის სავალდებულო არ არის **RMG** ჯგუფში შემავალი კომპანიებისათვის; ხოლო შეუსრულებლობა არ ქმნის პრობლემებს. თუ კანონდარღვევა გამჟღავნდა ყოველთვის მოიძებნება მისი დაკანონების, თუნდაც უკანონო, გზა.

2019 წლის 28 მარტს საქართველოს გარემოს დაცვისა და სოფლის მეურნეობის სამინისტროს ვებ-გვერდზე გამოქვეყნდა [განცხადება](#) ბოლნისის მუნიციპალიტეტში, შპს „არ ემ ჯი აურამაინის“ ბექთაქარის ოქრო-პოლიმეტალური საბადოს ტერიტორიაზე, რეზერვუარ-სალექარის მოწყობის პროექტის სკოპინგის ანგარიშის⁸ საჯარო განხილვის თაობაზე. როგორც განცხადებაზე თანდართული დოკუმენტაციიდან ირკვეოდა, 2019 წლის 21 მარტს შპს არემჯი აურამაინის გენერალურმა დირექტორმა თორნიკე ლიპარტიამ წერილით მიმართა საქართველოს გარემოს დაცვისა და სოფლის მეურნეობის სამინისტროს რომლითაც აცნობა, რომ კომპანიას **დაგეგმილი აქვს** ბექთაქარის ოქრო-პოლიმეტალური საბადოს მიმდებარე ტერიტორიაზე **17800მ3** მოცულობის რეზერვუარი-სალექარის მოწყობა და განსახილველად და სკოპინგის დასკვნის მოსაპოვებლად წარუდგინა ბექთაქარის ოქრო-პოლიმეტალური საბადოს მიმდებარე ტერიტორიაზე **17800 მ3** მოცულობის რეზერვუარი-სალექარის მოწყობის პროექტის სკოპინგის ანგარიში.

2019 წლის 12 აპრილს სოფელ ბერთაკარში ჩატარდა **დაგეგმილი საქმიანობის** სკოპინგის ანგარიშის განხილვა, რომელსაც მწვანე ალტერნატივას წარმომადგენლებიც ესწრებოდნენ. საჯარო განხილვის შემდეგ, მწვანე ალტერნატივას მოთხოვნით საპროექტო ტერიტორიის დათვალიერება მოხდა. როგორც ადგილზე გასვლის შედეგად გაირკვა არ ემ ჯი აურამაინს არა თუ დაგეგმილი, არამედ უკვე დამთავრებული ჰქონდა მშენებლობა. საპროექტო ტერიტორიაზე უკვე მოწყობილი იყო ორი სალექარი. აღნიშნულის შესახებ დაუყოვნებლივ ვაცნობეთ მინისტრს და შესაბამისი ნებართვის გარეშე სალექარის მშენებლობის ფაქტისა და სკოპინგის დასკვნის მოტყუებით მოპოვების გამომიება მოვითხოვეთ. მწვანე ალტერნატივას საჩივარი მინისტრის მოადგილე ნინო თანდილაშვილმა გარემოსდაცვითი

⁷ დეტალური ინფორმაციისათვის იხილეთ მწვანე ალტერნატივას 2013 წლის ანგარიში „მადნეული კანონზე მაღლა“ და 2015 წლის კვლევა „ბუნებრივი რესურსების მართვა და ელიტური კორუფციის ხელშემწყობი ფაქტორები“ www.greenalt.org-ზე და საქართველოს ახალგაზრდა იურისტთა ასოციაციის 2015 წლის კვლევა „საყდრისი-ყაჩაღიანი - ნგრევა კანონის სახელით“ www.gyla.ge-ზე

⁸ გარემოსდაცვითი შეფასების კოდექსის თანახმად, სკოპინგი არის პროცედურა, რომელიც განსაზღვრავს გარემოზე ზემოქმედების შეფასებისათვის მოსაპოვებელი და შესასწავლი ინფორმაციის ჩამონათვალს და ამ ინფორმაციის გარემოზე ზემოქმედების ანგარიშში ასახვის საშუალებებს;

ზედამხედველობის დეპარტამენტს მხოლოდ ერთი კვირის შემდეგ, 2019 წლის 23 აპრილს გადაუგზავნა და კომპეტენციის ფარგლებში საკითხის შესწავლა სთხოვა.

საგულისხმოა, რომ ჩვენს მიერ მოგვიანებით გამოთხოვილ ადმინისტრაციული წარმოების მასალებში არ მოიპოვება რაიმე დოკუმენტი, რომელიც დაადასტურებდა სამინისტროს გარემოსდაცვითი შეფასების სამმართველოს თანამშრომლის (რომელიც უძღვებოდა განხილვას) ან მისი ზემდგომის მიერ კანონდარღვევის ფაქტის შესახებ გარემოსდაცვითი ზედამხედველობის დეპარტამენტისათვის შეტყობინების ფაქტს.

ვინაიდან საჩივარზე პასუხად არ მიგვიღია სამინისტროს გამომხაურება, 2019 წლის 10 მაისს მოვითხოვეთ კანონდარღვევის ფაქტის შესახებ მოწოდებული ინფორმაციის გადამოწმებისა და ფაქტის შესწავლისათვის სამინისტროს მიერ განხორციელებული ქმედებების შესახებ ინფორმაცია. პასუხი მხოლოდ 2019 წლის 3 ივლისს მივიღეთ. წერილში აღნიშნული იყო:

„1. ადგილზე განხორციელებული ინსპექტირების შედეგად დადგინდა, რომ შპს "არ ემ ჯი აურამაინი"-ს მიერ მიწის ექსკავაციისას, კერძოდ გვირაბის პორტალის შესასვლელის, სალექარების, გვირაბის გაყვანის შედეგად წარმოქმნილი ფუჭი ქანების განთავსების, სამშენებლო მოედნამდე მისასვლელი გზის, სამშენებლო მოედანის მიმდებარედ ავტოსადგომის მოწყობისა და სხვა დამხმარე ნაგებობების მშენებლობის პროცესში, არ განხორციელდა ნიადაგის ნაყოფიერი ფენის მოხსნა და დასაწყობება "ნიადაგის ნაყოფიერი ფენის მოხსნის, შენახვის, გამოყენებისა და რეკულტივაციის შესახებ ტექნიკური რეგლამენტის დამტკიცების თაობაზე" საქართველოს მთავრობის 2013 წლის 31 დეკემბრის №424 დადგენილების მე-3 მუხლის მე-2 და მე-5 პუნქტის, ასევე მე-11 პუნქტის მოთხოვნათა შესაბამისად;

2. როგორც იუსტიციის სამინისტროს საჯარო რეესტრის ეროვნული სააგენტოს 2019 წლის 29 მაისის №185054 წერილით დადგინდა, სამშენებლო მოედნის მიმდებარედ არსებული ტერიტორია (უძრავი ნივთი), სადაც მოწყობილია ავტოსადგომი (ფართობი 500 მ²) საკუთრების უფლება არ არის რეგისტრირებული. აღნიშნული ნაკვეთი წარმოადგენს სახნავის კატეგორიის სასოფლო-სამეურნეო დანიშნულების მიწებს, შესაბამისად, კომპანიის მიერ, მიწის გამოყენება ხდება არამიზნობრივად. ამდენად დადგინდა, რომ შპს "არ ემ ჯი აურამაინი"-ს მიერ ჩადენილია საქართველოს ადმინისტრაციულ სამართალდარღვევათა კოდექსის 51-ე, 512 და 532-ე მუხლებით გათვალისწინებული სამართალდარღვევა. აღნიშნულიდან გამომდინარე, 2019 წლის 18 ივნისს შედგა ადმინისტრაციული სამართალდარღვევის შესახებ №051570 და №051571 ოქმები. ასევე გამოანგარიშდა მიწების (ნიადაგის) დეგრადაციის შედეგად გარემოსათვის მიყენებული ზიანის ოდენობა, რომელმაც შეადგინა 1105,74 ლარი. ოქმები თანდართული მასალებით, განსახილველად დეპარტამენტის 2019 წლის 27 ივნისის №DES91900038224 და №DES41900038229 წერილებით, გადაეგზავნა ბოლნისის რაიონულ სასამართლოს.

3. ნარჩენების მართვის კოდექსის მე-14 მუხლის შესაბამისად, შპს "არ ემ ჯი აურამაინი" ვალდებული იყო, შეემუშავებინა კომპანიის ნარჩენების მართვის გეგმა და შესათანხმებლად წარედგინა სამინისტროში, რაც კომპანიას არ განუხორციელებია.

4. ასევე ნარჩენების მართვის კოდექსის 29-ე მუხლის შესაბამისად, შპს "არ ემ ჯი აურამაინი" ვალდებული იყო, საქართველოს გარემოს დაცვისა და სოფლის მეურნეობის მინისტრის 2018 წლის 9 იანვრის №2-11 ბრძანების შესაბამისად, 2018 წელს წარმოქმნილი ნარჩენების შესახებ ინფორმაცია, ელექტრონულად <http://waste.moe.gov.ge>-ს მეშვეობით, 2019 წლის 1 მარტამდე, წარედგინა სამინისტროში,

რაც კომპანიას არ განუხორციელებია. ამდენად დადგინდა, რომ შპს "არ ემ ჯი აურამაინი"-ს მიერ ჩადენილია ნარჩენების მართვის კოდექსის 43-ე მუხლის მეორე ნაწილით და 44-ე მუხლით გათვალისწინებული სამართალდარღვევა. აღნიშნულიდან გამომდინარე, 2019 წლის 18 ივნისს შედგა ადმინისტრაციული სამართალდარღვევის შესახებ №051573 ოქმი. რომელიც თანდართულ მასალებთან ერთად, დეპარტამენტის 2019 წლის 27 ივნისის №DES01900038144 წერილით, განსახილველად გადაეგზავნა თბილისის საქალაქო სასამართლოს.

5. ასევე გამოვლინდა, რომ შპს "არ ემ ჯი აურამაინი"-ს წყლების შესაგროვებლად ბოლნისის მუნიციპალიტეტის, სოფ. ბერთაკარის მიმდებარედ, მოწყობილი აქვს 17 800 მ3 მოცულობის სალექარი, თუმცა აღნიშნულ საქმიანობაზე არ გააჩნია გარემოსდაცვითი შეფასების კოდექსით გათვალისწინებული გარემოსდაცვითი გადაწყვეტილება. ამდენად, დადგინდა, რომ შპს "არ ემ ჯი აურამაინი"-ს მიერ ჩადენილია საქართველოს ადმინისტრაციულ სამართალდარღვევათა კოდექსის 797 მუხლის პირველი ნაწილით გათვალისწინებული სამართალდარღვევა. აღნიშნულიდან გამომდინარე, 2019 წლის 18 ივნისს, შედგა ადმინისტრაციული სამართალდარღვევის შესახებ №051572 ოქმი, რომელიც თანდართულ მასალებთან ერთად, დეპარტამენტის 2019 წლის 27 ივნისის №DES11900038172 წერილით, განსახილველად გადაეგზავნა ბოლნისის რაიონულ სასამართლოს.

მწვანე ალტერნატივამ დამატებით მოითხოვა ინფორმაცია შპს „არ ემ ჯი აურამაინ“-ის მიერ სამინისტროსა და საზოგადოებისათვის ცრუ ინფორმაციის მიწოდებისა და ბექთაქარის საბადოს მიმდებარე ტერიტორიაზე უკვე მოწყობილი რეზერვუარი-სალექარისათვის მოტყუებით გარემოსდაცვითი გადაწყვეტილების მოპოვების მცდელობასთან დაკავშირებით სამინისტროს მიერ მიღებული ზომების შესახებ. რაზეც სამინისტრომ გვაცნობა, რომ „შპს „არ ემ ჯი აურამაინის“ მიერ განხორციელებულ სამართალდარღვევებთან დაკავშირებით, გარემოსდაცვითი ზედამხედველობის დეპარტამენტის მიერ, განხორციელდა კანონმდებლობით გათვალისწინებული რეაგირება და შედგენილი სამართალდარღვევების ოქმები განსახილველად გადაეგზავნა შესაბამის სასამართლოს“.

ვინაიდან გარემოს დაცვისა და სოფლის მეურნეობის სამინისტროს პასუხიდან ნათელი იყო, რომ სამინისტროს თანამშრომლებს არაფერი გაუკეთებიათ კომპანიის მიერ საზოგადოებისა და საჯარო უწყების მოტყუებით ნებართვის მოპოვების ფაქტზე რეაგირებისათვის, მწვანე ალტერნატივამ სამინისტროს შიდა აუდიტის დეპარტამენტს სამოხელეო გულგრილობის და/ან კორუფციული გარიგების შესწავლის მოთხოვნით მიმართა. პასუხად მივიღეთ, შიდა აუდიტის დეპარტამენტის ხელმძღვანელის მოადგილის ჯემალ დონაძის პასუხი, რომელმაც აგვიხსნა, რომ სამინისტროს გარემოსდაცვითი ზედამხედველობის დეპარტამენტის ძირითადი ფუნქციაა გარემოსდაცვითი კუთხით კანონდარღვევათა ფაქტებზე რეაგირება.

ბატონმა დონაძემ ასევე განგვიმარტა, რომ თუკი მიგვაჩნდა, რომ ადგილი ჰქონდა რაიმე სხვა სახის დარღვევას, შეგვეძლო მიგვემართა შესაბამისი ორგანოსათვის.

სამინისტროს მმართველობის სფეროში შემავალ სახელმწიფო საექსპლუატაციო დაწესებულებებს წარმოადგენს გარემოსდაცვითი ზედამხედველობის დეპარტამენტი (გზდ), რომლის ძირითადი ფუნქციაა გარემოსდაცვითი კუთხით კანონდარღვევათა ფაქტებზე რეაგირება.

სამინისტროს შიდა აუდიტის დეპარტამენტის მიერ შესწავლილ იქნა ზემოაღნიშნული საქმის მასალები, რასთან დაკავშირებითაც ხაზგასმით გვინდა ავლინდეთ, რომ *გზდ-მ* მოახდინა რეაგირება მოქმედი კანონმდებლობის ფარგლებში, რაც სამართლებრივად შეუძლებელია და შემდგომი რეაგირების მიზნით გადაეგზავნა ბოლნისის რაიონულ სასამართლოს, შესაბამისად, თქვენს წერილში მოყვანილი არგუმენტი, თითქოსდა „სამინისტროს არაფერი გაუკეთებია კომპანიის პასუხისმგებლობის დასაყენებლად“ საფუძველს მოკლებულია.

აქვე უნდა აღნიშნოს, რომ „საქართველოს გარემოს დაცვისა და სოფლის მეურნეობის სამინისტროს სახელმწიფო საქვეუწყებო დაწესებულების – გარემოსდაცვითი ზედამხედველობის დეპარტამენტის მიერ სახელმწიფო კონტროლის განხორციელების წესის შესახებ“ მთავრობის 2015 წლის 17 თებერვლის #61 დადგენილების თანახმად, სისხლის სამართლის დანაშაულის სავარაუდო ნიშნების გამოვლენის შემთხვევაში, ინსპექტირების აქტი ან/და ადმინისტრაციული სამართალდარღვევის შესახებ ოქმი და საქმის სხვა მასალები შემდგომი რეაგირებისათვის ეგზავნება შესაბამის საგამომიებო ორგანოებს; ხოლო, თუ ინსპექტირების შედეგად გამოვლინდა სავარაუდო ადმინისტრაციული სამართალდარღვევა, რომელიც არ წარმოადგენს დეპარტამენტის კომპეტენციას და დეპარტამენტისათვის ცნობილია, რომელიც ადმინისტრაციული ორგანოს უფლებამოსილებას მიეკუთვნება აღნიშნული, შესაბამისი ინფორმაცია, საქმის მასალებთან ერთად, შემდგომი რეაგირებისათვის გადაეცემა შესაბამის ადმინისტრაციულ ორგანოს - რაც გარემოსდაცვითი ზედამხედველობის დეპარტამენტმა მოცემულ შემთხვევაში არ გააკეთა.

ვიდრე ჩვენ სამინისტროს შიდა აუდიტის დეპარტამენტის საკითხის გამოძიების აუცილებლობაში დარწმუნებას ვცდილობდით, შემდეგ კი საქართველოს პარლამენტის გარემოს დაცვისა და ბუნებრივი რესურსების კომიტეტის თავმჯდომარეს, კახაბერ კუჭავას საპარლამენტო ზედამხედველობის ფარგლებში სამინისტროს ქმედებების შესწავლას ვთხოვდით, გარემოს დაცვისა და სოფლის მეურნეობის სამინისტროს ვებ-გვერდზე გამოქვეყნდა მინისტრის ბრძანება „შპს „არ ემ ჯი აურამაინ“-ის ბექთაქარის ოქრო-პოლიმეტალური საბადოს მიმდებარე ტერიტორიაზე 17800 მ3 მოცულობის რეზერვუარი-სალექარის მოწყობის პროექტზე სკოპინგის დასკვნის გაცემის შესახებ“. ბრძანების თანახმად, „გარემოსდაცვითი შეფასების კოდექსის“ II დანართის მე-9 პუნქტის 9.9. ქვეპუნქტის საფუძველზე შპს „არ ემ ჯი აურამაინ“-ის ბექთაქარის ოქრო-პოლიმეტალური საბადოს მიმდებარე ტერიტორიაზე 17800 მ3 მოცულობის რეზერვუარი-სალექარის მოწყობის პროექტზე სკოპინგის დასკვნა გაიცა.

საქართველოს გარემოს დაცვისა და სოფლის მეურნეობის სამინისტრომ არაფერი გააკეთა შპს არ ემ ჯი აურამაინის მიერ საზოგადოებისა და თავად სამინისტროს მოტყუების მცდელობის აღსაკვეთად.

ნაცვლად ამისა, სამინისტრომ არათუ აღკვეთა, არამედ წახალისა კიდევაც მსგავსი ქმედება; თავად დარღვია კანონი და უკვე მიმდინარე საქმიანობაზე გასცა სკოპინგის დასკვნა. საგულისხმოა, რომ სამინისტროს მიერ გაცემული სკოპინგის დასკვნა სავალდებულოა საქმიანობის განმახორციელებლისთვის გარემოზე ზემოქმედების შეფასების ანგარიშის მომზადებისას - თუმცა, როგორც უნდა მოამზადოს შპს „არ ემ ჯი აურამაინმა“ უკვე მიმდინარე საქმიანობაზე გარემოზე ზემოქმედების შეფასება, რომელიც მხოლოდ დაგეგმილ საქმიანობას შეიძლება ჩაუტარდეს - გაუგებარია.

რა თქმა უნდა, მწვანე ალტერნატივამ გაასაჩივრა მინისტრის სრულიად დაუსაბუთებელი და კანონსაწინააღმდეგო და თავისი არსით დანაშაულებრივი გადაწყვეტილება⁹.

საგულისხმოა, რომ აბსოლუტურად იდენტური სიტუაცია იყო 2014 წელს RMG Gold-ის მიერ გამოსატუტი მოედნების მშენებლობასთან დაკავშირებით. RMG Gold-მა ჯერ ააშენა გამოსატუტი მოედნები, ხოლო

⁹ სარჩელი წარდგენილია თბილისის საქალაქო სასამართლოში 2019 წლის 6 დეკემბერს.

შემდეგ მშენებლობისათვის გარემოზე ზემოქმედების ნებართვის მისაღებად საჭირო დოკუმენტაცია ჯერ დაინტერესებულ საზოგადოებასთან განიხილა და შემდეგ სამინისტროში წარადგინა ნებართვის მოსაპოვებლად. სტუდენტური მოძრაობა „მწვანე მუშტის“ დამსახურებით¹⁰ საზოგადოებისათვის ცნობილი გახდა კომპანიის მიერ საზოგადოებისა და სამინისტროს მოტყუებით ნებართვის მოპოვების მცდელობის შესახებ, თუმცა ეს არ გამხდარა საჯარო უწყებების მხრიდან რეაგირების საფუძველი. ნაცვლად ამისა, გარემოსა და ბუნებრივი რესურსების დაცვის სამინისტრომ კომპანიას შესაძლებლობა მისცა გაეხმო წარდგენილი განცხადება დოკუმენტაციაში ტექნიკური ცვლილებების საჭიროების საბაზით; ხოლო მოგვიანებით მისცა კომპანიას მიმდინარე საქმიანობის განხორციელების უფლება. ამდენად კანონის დარღვევით საქმიანობის განხორციელების უფლების მოპოვება RMG ჯგუფის კომპანიებისათვის უკვე კარგად ნაცადი გზაა და საჯარო უწყებებიც მონდომებით უწყობენ ხელს ამ პრაქტიკის დამკვიდრებას.

საწარმოების გარემოზე ზემოქმედება

საწარმოების გარემოზე ზემოქმედების შესახებ არსებული ინფორმაციის ხელმისაწვდომობის თვალსაზრისით ერთი წლის განმავლობაში არაფერი შეცვლილა. ჩვენს მიერ **2018** წლის ბოლოსათვის მოძიებული და დამუშავებული ინფორმაცია კვლავაც აქტუალურია და თავმოყრილია [კომპანიის 2018 წლის პროფილში](#).

კომპანიის [ვებ-გვერდზე](#) კვლავაც არ არის წარმოდგენილი ინფორმაცია გარემოს მდგომარეობის შესახებ, საწარმოების საქმიანობით გარემოსთვის მიყენებული ზიანისა და მისი შემსუბუქებისთვის დაგეგმილი და/ან მიმდინარე ღონისძიებების შესახებ. საწარმოების საქმიანობის შედეგად ადგილობრივი ბუნებრივი და სოციალური გარემოსათვის ზიანის მიყენების საფრთხეების და ამ საფრთხეების თავიდან აცილებისათვის გატარებული და/ან გასატარებელი ღონისძიებების შესახებ.

საგულისხმოა, რომ **2018** წლის **1** იანვრიდან გარემოსდაცვითი შეფასებების კოდექსის ამოქმედებასთან ერთად გარემოს დაცვისა და სოფლის მეურნეობის სამინისტრო ვალდებულია სამინისტროს ვებ-გვერდზე გამოაქვეყნოს საქმიანობის შემდგომი ანალიზი, რომელიც მოიცავს:

- ა) პირობებისა და შემარბილებელი ღონისძიებების მონიტორინგს;
- ბ) საქმიანობის განხორციელებით გამოწვეული გარემოზე ზემოქმედების ანალიზს;
- გ) გზშ-ის ანგარიშით გათვალისწინებული გარემოს მახასიათებლების ცვლილებების შეფასებას.

ეს ვალდებულება კოდექსის ამოქმედებიდან მეორე წლის მიწურულსაც კი არ სრულდება - არც არემჯის კომპანიების და არც ნებისმიერი სხვა საწარმოს მიმართ. პირობების შესრულების მდგომარეობის შესახებ ინფორმაციის მოპოვება მხოლოდ საჯარო ინფორმაციის მოთხოვნის საფუძველზეა შესაძლებელი.

¹⁰ ["მწვანე მუშტი" მთავრობას მიმართავს და საყდრისის ახალ ფოტოებს ავრცელებს, 13 იანვარი 2014, ლიბერალი](#)

წიალით სარგებლობის ლიცენზიები

არემჯი ჯგუფში შემავალი კომპანიების საკუთრებაში არსებული წიალით სარგებლობის ლიცენზიები - ამონარიდი წიალის ეროვნული სააგენტოს მიერ მოწოდებული წიალით სარგებლობის ლიცენზიების რეესტრიდან¹¹.

ლიცენ- ზიის ნომერი	ობიექტის დასახელება	ლიცენზი ის მფლო- ბელი	რეგისტრაციის და მოქმედების ვადა	რესურსის მოცულობა	ფართობი	გადაცემა
10	ბოლნისის ჯგუფის ცნობილი საბადოების წიაღისეულის გეოლოგიური შესწავლა და შემდგომი მოპოვება (ბოლნისის, დმანისის და მარნეულის რაიონები)	შპს RMG Gold	07.04.1994 30.12.1996 20 წელი ვადა გაუ- გრძელდა 01.01.15 ვადა გაუ- გრძელდა 01.01.20წ.		9.0 ჰა	შპს „ტრანს-ჯორჯიენ რესურსს“ გადაფორმდა ბრძ. №1-1/291 11.02.09 შპს „კვარციტზე“ გაცემული ლიცენზია გადაფორმდა ბრძ. №13/544 30.10.12წ. ბრძ. №245 07.04.14წ. ბრძ. №478/ს 31.12.14წ.
11	მადნეულის ოქრო-სპილენძ-ბარიტ-პოლიმეტალური ექსპლუატაციაში მყოფი საბადოს კომპლექსური დამუშავება ბოლნისის რაიონში	სს RMG Copper	12.04.94 23.07.97 20 წელი	1) სპილენძის მადანი-5070000 (Cu-0.35%, Au-0.41გრ/ტ, Ag-1.68გრ/ტ) 2) ოქროს შემცველი მეორადი კვარციტები - 2713200 (Au-1.02 გრ/ტ, Ag-5.15გრ/ტ)	421,45 ჰა	შევიდა ცვლილება ბრძ. №13/15 14.05.12წ. სს „მადნეულზე“ გაცემული ლიცენზია გადაფორმდა ბრძ. №13/546 30.10.12წ.
1000874	სასარგებლო წიაღისეულის (ფერადი, კეთილშობილი, იშვიათი მეტალები და ბარიტი) შესწავლა-მოპოვება ბოლნისის მუნიციპალიტეტში	სს RMG Copper	30.10.12 12.04.14		26.28 ჰა	სს „მადნეული“-ზე გაცემული 1000281 ლიცენზია გადაფორმდა
1002122	სასარგებლო წიაღისეულის (ფერადი, კეთილშობილი, იშვიათი მეტალები და ბარიტი) შესწავლა-მოპოვება ბოლნისის და დმანისის მუნიციპალიტეტებში	შპს RMG Gold	25.11.14 02.01.42 ლიცენზიის დაწყება 01.01.15		193.76 ჰა	1000577 ლიცენზიის ნაწილი გადასცა შპს „მაინინგ ინვესტმენტს“-მა 1001028 ლიცენზიის ცვლილება შპს „Mining Investments Gold“-ზე გაცემული 1001539 ლიცენზიის ცვლილება (შერწყმა)
1003161	სასარგებლო წიაღისეულის (ფერადი,	სს ჯორჯიან კოპერ ენდ	04.12.15 13.10.41	შესწავლის ვადა 72 თვე (1 წელი, 10 თვე, 8 დღე)	86 107.669 ჰა	შევიდა ცვლილება ბრძ. №414 23.10.13წ. შევიდა ცვლილება

¹¹ წიალით სარგებლობის ლიცენზიების რეესტრი 2019 წლის 4 დეკემბრის მდგომარეობით. დოკუმენტი მხოლოდ მოთხოვნის საფუძველზე ხელმისაწვდომია წიაღის ეროვნული სააგენტოში

ლიცენზიის ნომერი	ობიექტის დასახელება	ლიცენზიის მფლობელი	რეგისტრაციის და მოქმედების ვადა	რესურსის მოცულობა	ფართობი	გადაცემა
	კეთილშობილი-ლი, იშვიათი მეტალები და ბარიტი შესწავლა-მოპოვება ბოლნისის, მარნეულის, დმანისის, წალკისა და თეთრიწყაროს მუნიციპალიტეტები	გოლდი				(შესწავლის ვადა გაეზარდა) ბრძ.#1784/ს 10.11.15წ. 1000226 ლიცენზიის ნაწილი გადასცა შპს „კავკასიის სამთო ჯგუფი“-მა
1004034	„ბექთაქარის“ ოქრო-პოლიმეტალური საბადოდან სასარგებლო წიაღისეულის მოპოვება ბოლნისის მუნიციპალიტეტში	შპს არ ემ ჯი აურამაინ	19.10.16 13.10.41	ბექთაქარის საბადო: ოქრო-11987.87კგ, ვერცხლი-108712კგ, ტყვია-27448ტ, თუთია-57528ტ	სამთო - 345,7939 ჰა მიწა - 309.849 ჰა	შევიდა ცვლილება ბრძ.№414 23.10.13წ. შევიდა ცვლილება (შესწავლის ვადა გაეზარდა) ბრძ.#1784/ს 10.11.15წ. 1000226 ლიცენზიის ნაწილი გადასცა სს ჯორჯიან კოპერ ენდ გოლდს 1003160 ლიცენზიის ცვლილება (მოპოვება) 1003998 ლიცენზიის ნაწილი გადასცა შპს კავკასიის სამთო ჯგუფმა
1004600	„ბნელი ხევის“ ოქრო-პოლიმეტალური საბადოდან სასარგებლო წიაღისეულის მოპოვება თეთრიწყაროს მუნიციპალიტეტში	შპს ჯორჯიან გოლდ კომპანი	31.05.17 13.10.41	საბადოს ჩრდილო-აღმოსავლეთ უბანზე - ოქრო-1635.07 კგ, ვერცხლი-8503.79 კგ	სამთო - 239.4021 ჰა, მიწის - 504.6677 ჰა	შევიდა ცვლილება ბრძ.№414 23.10.13წ. შევიდა ცვლილება (შესწავლის ვადა გაეზარდა) ბრძ.#1784/ს 10.11.15წ. 1000226 ლიცენზიის ნაწილი გადასცა სს ჯორჯიან კოპერ ენდ გოლდს 1003160 ლიცენზიის ცვლილება (მოპოვება) 1003998 ლიცენზიის ნაწილი გადასცა შპს არ ემ ჯი აურამაინს 1004035 ლიცენზიაში ცვლილება (მარაგები დამტკიცდა) 1004318 ლიცენზიის ნაწილი გადასცა შპს კავკასიის სამთო ჯგუფმა
1005299	„დიდი დმანისის“ მეორადი კვარციტების მოპოვება დმანისის მუნიციპალიტეტში	შპს RMG Gold	07.03.18 21.12.25	მინიმუმ 90000 ტონა/წელიწადში	10.0 ჰა	წიაღით სარგებლობის 0673 ლიცენზია მთლიანად გადასცა შპს სამშენებლო მასალებმა

ლიცენზიის ნომერი	ობიექტის დასახელება	ლიცენზიის მფლობელი	რეგისტრაციის და მოქმედების ვადა	რესურსის მოცულობა	ფართობი	გადაცემა
1005314	სასარგებლო წიაღისეულის (ფერადი, კეთილშობილი, იშვიათი მეტალები და ბარიტი) შესწავლა-მოპოვება ბოლნისის, მარნეულის, დმანისის, წალკისა და თეთრიწყაროს მუნიციპალიტეტები	შპს კავკასიის სამთო ჯგუფი	14.03.18 13.10.41	დავით-გარეჯის ოქრო-ბარიტ-პოლიმეტალური საბადო: ვერცხლი-108.93ტ (108930კგ), ბარიტი-895191.59ტ დანარჩენ უზნებზე შესწავლის ვადა - 120 თვე	100865.459 4 ჰა	შევიდა ცვლილება ბრძ.№414 23.10.13წ. შევიდა ცვლილება (შესწავლის ვადა გაეზარდა) ბრძ.#1784/ს 10.11.15წ. 1000226 ლიცენზიის ნაწილი გადასცა სს ჯორჯიან კოპერ ენდ გოლდს 1003160 ლიცენზიის ცვლილება (მოპოვება) 1003998 ლიცენზიის ნაწილი გადასცა შპს არ ემ ჯი აურამაინს 1004035 ლიცენზიაში ცვლილება (მარაგები დამტკიცდა) 1004318 ლიცენზიის ნაწილი გადასცა შპს ჯორჯიან გოლდ კომპანის 1004601 ლიცენზიის ცვლილება (შესწავლის ვადის გაზრდა)
1005456	სასარგებლო წიაღისეულის (ფერადი, კეთილშობილი, იშვიათი მეტალები და ბარიტი) შესწავლა-მოპოვება (ბოლნისის მუნიციპალიტეტში)	სს RMG Copper	10.05.18 16.04.41	ოქრო - 1804.6912 კგ; ვერცხლი-64 900.344 კგ; სპილენძი-26815.06ტ; ოქრო - 1691.16 კგ	1035.5 ჰა	1000577 ლიცენზიის ნაწილი გადასცა შპს მაინინგ ინვესთმენტმა იჯარით გადასცა სს RMG Copper-ს 2014 წლის 12 ივლისის ჩათვლით შპს Mining Investments Copper-ზე გაცემული 1001030 ლიცენზიის ცვლილება 1002121 ლიცენზიის ცვლილება (დამტკიცდა მარაგები) 1004727 ლიცენზიის ცვლილება (დამტკიცდა მარაგები)

მწვანე ალტერნატივას 2019 წლის გამოცემაში [„წიაღის მოპოვების ლიცენზიანტების პროფილები“](#) წარმოდგენილია ინფორმაცია წიაღის მოპოვების ისეთი მნიშვნელოვანი არეალის შესახებ, როგორცაა ქვემო ქართლის, წალკის, თეთრი წყაროს, დმანისის, ბოლნისისა და მარნეულის მუნიციპალიტეტების ტერიტორიები, სადაც ფერადი ლითონების მოპოვება ხდება. ინფორმაცია მოიცავს:

- წიაღით სარგებლობის ლიცენზიის მფლობელები;

- ლიცენზიის მოქმედების ვადა, ფართობი, მოსაპოვებელი რესურსის ოდენობა;
- ლიცენზიის პერიმეტრში მოქცეული ტყით დაფარული ფართობი;
- გასული წლების განმავლობაში ტყის ფართობის კარგვა;
- სპეციალური დანიშნულებით ტყითსარგებლობის ხელშეკრულებები;
- წიაღით მოსარგებლის მიერ დაგეგმილი/განხორციელებული სარეკულტივაციო ღონისძიებები;
- ტყის ეკოსისტემების საკომპენსაციო ღონისძიებები (აღდგენა, განახლება, ხელშეწყობა) და ფულადი კომპენსაციები.

HEINRICH BÖLL STIFTUNG
თბილისი
 სამხრეთ კავკასია


დოკუმენტი გამოცემულია მწვანე ალტერნატივას, ჰაინრიჰ ბიოლის ფონდის თბილისის ოფისთან თანამშრომლობით, მიმდინარე პროექტის ფარგლებში - „ადვოკატირება მინერალური რესურსების გამჭვირვალე და პასუხისმგებლიანი მართვისთვის“ და ღია საზოგადოების ფონდების ქსელის ფინანსური მხარდაჭერით მიმდინარე პროექტის „ენერჯეტიკის, წიაღით სარგებლობისა და ტრანსპორტის სექტორებში მმართველობის გაუმჯობესების ხელშეწყობისათვის საქართველოში“ ფარგლებში.



ანგარიშის შინაარსზე სრულად პასუხისმგებელია მწვანე ალტერნატივა და ის არავითარ შემთხვევაში არ გამოხატავს ჰაინრიჰ ბიოლის ფონდის თბილისის ოფისის და ღია საზოგადოების ფონდების ქსელის შეხედულებებს.

ავტორი: ნინო გუჯარაიძე

© მწვანე ალტერნატივა, 2019



თბილისი, 0179,
 ფალიაშვილის ქ. #39ბ, IV სართული
 ტელ.: 222 38 74
GREENALT@GREENALT.ORG
WWW.GREENALT.ORG